

Il Consei regjonâl al à votât ae unanimitât un ordin dal dì par impegnâ la Zonte a garantî che a sedin sostignudis ancje lis iniziativis di cualitât par furlan.

» DI CHRISTIAN ROMANINI

Claudio Violino, Elio De Anna, Pietro Paviotti, Alessandro Colautti, Vincenzo Martines, Mara Piccin, Barbara Zilli, Roberto Revelant, Giovanni Barillari, Elena Bianchi, Cristian Sergo, Giulio Lauri e Cristiano Shaurli lu àn firmât e presentât; il Consei regjonâl lu à votât ae unanimitât.

Di ce si tratial? Al è un ordin dal dì poiât di dutis lis fuarcis politichis che tal ultin consei al à deliberât di impegnâ la Zonte a garantî che, te programazion dai intervents de Regjon, in atuazion de gnove leç regjonâl pes ativitâts culturâls, a sedin sostignudis lis iniziativis di cualitât in lenghe furlane tai setôrs dai spettacui.

In particolâr, si fevele di ativitâts teatrâls, cinematografichis e musicâls che a vedin ancje une programazion plurienâl definide in maniere coordenade tra i ents plui cualificâts dai rispetîfs setôrs.

Un impegn impuartant che o vin volût comentâ cun **William Cisilino**, diretôr de Agjenzie regjonâl pe lenghe furlane.

Prin di dut, pai mancual tecnics, ce isal un 'ordin dal dì' e cuale la sô funzion?

“A mè none lu varès spiegât cusì: ‘pluistot di nuie, miôr pluistot’. Un ordin dal dì di un organism legjislatîf al ven fat bon co no si rivê a meti dentri te leç un determinât emendament. Ta chest câs a jerin stadis domandadis dôs normis”.



William Cisilino

Vonde esclusion pe nestre lenghe

Cualis?

“Une, di principi, su lis minorancis de regjon tant che patrimoni culturâl di dut il F-VJ, presentade di Shaurli e altris: passade. Chê altre sui spettacui par furlan (presentade di Violino e altris), che dut câs Torrenti nol à poiât, ritignintle, ipse dixit, ‘scontade’, ma acetant di votâ un ordin dal dì”.

Ce valôr aial il fat che al sedi sostignût in maniere trasversâl?

“Che la cuistion e je sintude. Tai ultins agns o vin viodût cetancj spettacui di cualitât par furlan. Al è strategic pe Regjon che si continui a promovî”.

Ce compuartial a nivel pratic?

“Che no si podarà sei plui

escludûts, come che al avignive in passât par un regolament fat bon te ere Tondo, par vie che une ativitât e je fate intune des lenghis minoritariis de Regjon. Norme assurde, oltre che contrarie ae Costituzione e al Statût di Autonomie”.

Ce imprescj aie la zonte Serracchiani par metilu in vore?

“Prin di dut i gnûfs Regolaments, che a ‘nd è previodûts une fulugne ta chêt leç e che a tornaràn a passâ in Consei: li al varès di sei esplicitât alc. Cun di plui, mi auguri che dopo la Regjon e fasi un bant di pueste par chestis produzioni”.



ilfriuli@ilfriuli.it

■ MERIT FURLAN

I cuatri premiâts de Comunitât culinâr

A son 31 lis edizioni dal premi “Merit Furlan”, promovût de Comunitât culinâr dal Friûl e dal Comun di Rivis Darcjan, cu la colaborazion de Regjon Autonome Friûl-Vignesie Julie, la Provincie di Udin, il Corsorzi tra lis Pro Loco dal Friûl Culinâr e la Associazion Merit Furlan.

Il premi di chest an, che al sarà consegnât Sabide ai 9 di Avost, tal Cjistiel di Darcjan cuntun event che al scomençarà aes 6 e mieze di sere, al è stât assegnât a: Giorgio Beltrame, nassût a Sant Denêl tal 1953, chirurc e inovatôr te medisine oculistiche; Luigi Chiandetti, editôr e propulsôr de culture furlane; Ronaldo Gaiotti, nassût a Zirâ tal 1932, cjançant lyric di nomee internazionâl e Alberto Picotti, nassût a Udin tal 1929, scritôr e poete.

Tal program de serade e je previodude ancje la messe par furlan celebrade di pre **Roman Michelot** e l’intervent dal coro “Val d’Arzino”.

SCOLTADIS DI DRIUS

Gnot di amôr

“O ài fate une gnot di amôr” mi à dite cun braure un ami. Ma cemût? Les gnots di amôr ch’o fâs jo e durin si e no un cuârt d’ore!



Operazion metude adun jenfri la Polizie provinciâl e Carabinîrs cuintri il braconaç

Un braconîr denunciât e 42 esemplârs liberâts. Al è il belanç di une operazion condusde tai dîs passâts di bande de Polizie provinciâl e dai Carabinîrs des Stazions di Mueç e Scuse. Dilunc un patuliamint intun bosc a Neeve, i agjents de Polizie provinciâl a àn viodût une persone, che la sô identitât e jere bielzà cognossude aes fuarcis dal ordin, cuntune rêd di oselâ. Ordinât di fermâsi, la persone invezit di respiet l’ordin e je scjampade.

Subit a son scataadis lis ricercjis di bande dai agjents de Provincie e dai Carabinîrs cu la colaborazion dai pompîrs. Ricercjis che a àn permetût di rivâ a cjase dal braconîr e secuestrâ trapulis cul visc, cuatri rêts e 42 esemplârs di avifaune salvadie di diversis specis di ucei (sivilots, sfranzei, luiars, un verdon e un bechincrôs) subit liberâts. E je cussî scatade la

denuncie ae autoritât judiziarie pai reâts dal oselâ, detenzion di fringjills in numar superior a cinc e inosservance a un proviodiment de autoritât.

“Ancjemò une volte – al à comentât il President de Provincie Pietro Fontanini – si dimostre valide la ativitât di control metude in vore dai nestrîs agjents e a lôr ur va ancjemò une volte il gno ringraziament par un altri colp otignût cuintri cui che nol respiete il teritori e la sô faune”. Numerosis lis ativitâts puartadis indevant tai prins sîs mês dal an di bande dal Cuarp di Polizie Provinciâl: cirche mil i servizi di pa-

tuliamint sul teritori. I agjents a son intervignûts pe prevenzion e aciertament di reâts e di ilecits amministratîfs in svariâts setôrs: vigilance venatorie, vigilance su la

pesce tes aghis internis, control sui refudums, su la tutele des aghis e su lis emissions in atmosfere. Controi che a son stâts fats ancje in materie di protezion de faune e de flore e su lis pistis forestâls. Dongje a chescj servizi di polizie di nature ambientâl, la Polizie Provinciâl e à continuât te sô ativitât, tacade bielzà di cualchi an, di prevenzion e repression des violazioni al Codîç de Strade. Par chel che al rivuarde, in particolâr, la ativitât di tutele dal



Euronews informa

teritori, a son stâts fermâts e controlâts 106 cjaçadôrs, 223 i servizi tes zornadis di sabide e di domeie, in maniere di presidiâ il teritori ancje vie pal fin setemane. 8 lis notiziis di reât e 19 verbâi di aciertament amministratîfs. Cualchidun dai servizi plui significatîfs a son stâts realizâts cu la colaborazion dai Diretôrs des Riservis di cjace e dai cjaçadôrs, colaborazion che e je stade essenziâl pal sucès de cature dai braconîrs. Servizis specifics a son stâts realizâts ancje cu la colaborazion dal Cuarp Forestâl Regjonâl. Di bande de polizie ambientâl e urbanistiche, a son stâts fats 65 sorelûcs esternis e compiladis 18 notiziis di reât, notis e informativis ae Autoritât Judiziarie e 73 verbâi di aciertament in materie di aghis, refudums, ecotasse. Par chel che al rivuarde il control e il monitorament de faune salvadie 165 lis jessudis sul teritori; prelevâts in dut 1359 cjâfs jenfri nutris, bolps, corvidis, colomps. In colaborazion cun altris Ents, al è stât cjanpât un ors tal comun di Lusevare su la fonde di une autorizazion ministeriâl deliberade in favôr de Universitât dai Studis di Udin.